

Wulf Wagers wunderliche Weltbetrachtung

Herzinfarkt em Gaasstall

En Emsdetta em Münschterland hot sich en Fuchs durch en Kaninchengang en en Gaasstall grabe ond hot do zom Veschper a paar Gääs reiða wella.

Dr Fuchs hot nadierlich net drmit grechnet, dass dui Viecher en derra Jahreszeit grad beim Brüta send ond deshalb o'bacha aggressiv uf o'eigladene Besucher reagierat. Wie mir des jo au dädat.

Folglich send dui Gääs – die jo schon das Heilige Martin vrrota hend – auf den Fuchs losganga. Wo der hot wieder abhaua wella, hot'r allerdings des Kaninchenloch nemme gfonda ond hot sich so saumäßig über dui bleede Gääs ufgregt, dass'r ama Herzinfarkt gstorba ischt, wie dr Tierarzt feschtgstellt hot.



Ganz ähnlich könnt's onserm Landesvater Oettinger jetzt ganga. Der hot sich jo mit seiner Idee, dem Haus Baden des Schloss Salem ond die ganze Kunschtschätz' abzukaufa, die jo laut Expertaussage scho längscht em Land g'hörat, abzomkaufa, ond da Prinz Bernhard zom Verwalter einzusetza, ganz schee en d' Nessla gsetzt. Derra Familie, die den Besitz rontergwirtschaftet hot, nemmt mr d' Schulda ab ond lässt se monter

weitermisswirtschafta. 's isch jo net sei eiges Geld, sondern des von ons Bürger. Sei CDU-Fraktion lauft jetzt Sturm gega die Idee ond dr Oettinger muss sich warm a'zieha, dass es ihm net goht, wie dem Fuchs.

Letzsch Woch' hot übrigens dr französische Staatspräsident Nicolas Sarkozy beim Oettinger a'grufa ond froggt, ob er Baden kaufa könnt.

Dr Oettinger hot en gfroggt, was er drmit a'fanga wöllt. Dodruf hot er gsait, dass er da Eiffelturm in Paris renoviera möcht, ond dodrfier zwoi Milliona Nieta mit flache Köpf ...

Bis näggschd Woch'
Ihr
Wulf Wager